

I nerv da sul copat  
 Tut giù fin sui garat  
 Mi ij compro tuit afait, 2  
 A j'è la tassa an scrit,  
 Pro feita ancor da drit,  
 A sing e doi la lira,  
 Doi la lira,  
 Cosa voli tni dit? 2  
 O via, somne anteis?  
 Ch' i dagha man al peis?  
 Contomne dij quattrin? 2  
 A m'è pa vantagios  
 A stè sì tant ossios,  
 Sbrigoma prest le facende,  
 Prest le facende,  
 S' no steme tuit giojos. 2

### Le Serve dei Preti Secolari.

#### CANZONE XXXII.

S' i m' voleisse dè da beive,  
 Mi v' cantria una canson  
 Su le serve d' certi Preive  
 Tabaleuri, e trop mincion;  
 I voria ch' i rieisse  
 Vostra part sicurament,  
 E ch' da pr tut ij dieisse  
 Ch' a v' ha dait divertiment.  
 Sul prinsipi ste patête  
 Venta vede com' a fan,  
 A stan nen a fè d' barslète,  
 Leste an gamba, adrete d' man;

A son brave melnagere,  
 A fan tut con un bon gust,  
 E pr tute le manere  
 A fan vede ch'a l'an d'sust.

A fan subit le bigote,  
 Le Simonne e torsacoi,  
 Savie e chiete com' d'marmote,  
 Anganrio i savi e i foi;  
 Ma lo fan pr guadagnesse  
 Un bon nom e arputassion.  
 Pr podeje assicuresse  
 Ant la grassia dij padron.

Quand a j'an acaparaje,  
 A comenso lingerment  
 A caussese lor le braje,  
 Ma cosi sensibilment,  
 Ch'ij bon Preive d'ordinari  
 A s'acorso nen afait  
 D'esse pià com' tanti giari,  
 O moschin bagnà ant 'l lait.

I padron ch'a n'an già fane  
 Una stima e bon concet,  
 A s'afido a coule giane,  
 E s'na stan con so cheur chiet;  
 Armetendie poch pr vota  
 Coule ciav e coui ciavin  
 Del granè, dispensa e crota,  
 Dij burò e dij cherdenssin.

Quand a s'treuvo montà an sela  
 Con la brila e redne an man,  
 A comenso peui bravela,  
 E butè pr tut so gran;  
 E com' meistre dla finessa,  
 A van mmand con tuta pas  
 I padron pr la cavessa,  
 Pr la barba e pr 'l nas.

Fait ch' a l' an le gate morte,  
 A s' van via impossessand  
 Con d' manere drite e storte  
 Dla bachëta del comand;  
 E i bon Preive (soma grassia  
 A fè i borgno, ciorgn e mut),  
 E ste tiorbe con audassia,  
 Tramentrè masento tut.

Ai fan vive com' a veulo  
 Ant 'l beive e ant 'l mangè,  
 A stirasso fin ch' a peulo  
 Con la scusa d' avansè;  
 Ma lor son, pa tant tomonne,  
 A stan pa a coula passion;  
 Son volpasse sfrontadonne,  
 Ch' a l' an sempre i seu scondion.

Oh che brave controloire,  
 Ch' a san fè cousti trombon!  
 Che sibile, che dotoire,  
 Che sentense e che rason!  
 E i padron fait a l' oloca,  
 Osservè com' a stan li  
 Con la lenga e i dent an boca  
 A scotè lo ch' a san di.

A bei poch couste servente  
 (Gnun lo peulo pa neghè)  
 Van restand impertinente,  
 E boriose a tut andè;  
 E sti Preive ancor a rio,  
 Senza die nè bin, nè mal,  
 Ch' an criandie a dubitrio  
 D' fè quaich gros pecà mortal.

S' ai ven mal a coule siale,  
 I povri Preive son fora d' lor;  
 Van virand com' le farfale,  
 E butand la cà sot dsor;

Dlong 'l Medich e Spessiari,  
 E Sirogich e 'l folat,  
 Senza dan del so salari,  
 A s' ij treuvo li ai garat.

Quanta cura, quanti esami,  
 Che d' consulte, che d' rason!  
 Gnanch antorn a le gran dame  
 A j' uso pa pi d' atension;  
 A spendrio ste tendinne  
 Fin 'l cheur (oh i gran codogn!)  
 Pr provedie le meisinne,  
 E tut lo ch' ai fa da bsogn.

Andaran a visiteje  
 Des o dodes vote al di;  
 E s' un steissa li a cotieje,  
 A pasria quaicosa d' pi;  
 Tramantré coule smorfiasse  
 San tirè le soe botà,  
 E fè bin le soe svergnasse,  
 Tut pr esse papotà.

Dije un poch a cousti Preive  
 S' ancalran anvitè d' gent  
 A soe cà pr mangè e beive  
 Senza so consentiment?  
 Che disnè, che bela sinna  
 Ai fario sti ciapas!  
 Ai tratrio a la slandrinna  
 Con un moro da cagnas.

Venta pa ch' ij Preive a fasso  
 I bravas o j' armognos  
 Con ste bisse, ch' a ij sbramasso  
 Dandie subit su la vos;  
 E sti povri tiroliro,  
 Fait al breu d' ij strassasach,  
 Osservè com' a s' artiro  
 Con la soa berta an sach.

Chi vorrà mai desse d'arie  
 Con sti Preive a fè un contrat?  
 S' le servente son contrarie,  
 Son inutil tuti i pat;  
 Venta prima pensè d' feje  
 La cort a lor, e con d' present,  
 E caresse, capareje,  
 Pr podeje otni l' intent.

D' certi Preivi ai veulo finna  
 (Forse lo savri pa 'ncor),  
 Quand a son a disnè e sinna  
 Godie a tavo ansem a lor.  
 Cousta si l' è bin da scrive  
 Fin al Papa d' Cavorat,  
 Oh i tamborn! cosa na dive?  
 Ai n' è bin da fè un librat.

Povri dodo, ch' a bogèrio  
 Gnanch la punta d' un cavei  
 Senza prima ch' ai lo dio,  
 E ch' a ciamo so consei!  
 E lo ch' lor treuvo a proposit,  
 Con tuta puntualità,  
 Quand a fuss bin 'n sproposit,  
 Lolì dlong a l' è spuntà.

Quand ai sauta 'l rat an testa,  
 D' vote pr divertiment,  
 A ste sorbe d' andè an festa  
 A soe cà a trovè i parent,  
 Venta vede che meinagi,  
 E sti Preive a patojè,  
 Pr pronteje l' ocupagi  
 Senza ric o gasojè!

Quand la serva l' è peui partia,  
 E che 'l Preive resta sol,  
 A sta giust com' l' alegria  
 Ch' a sta un gat ansima un rol,

Ma coul di ch' a sa ch' ariva,  
 Oh che goi, oh che festin!  
 Ai va ancontra con dij viva,  
 Tut an gloria ant un sestin.  
 Quand i veuje intrè ant la scufia  
 A sti Preive, e fevie amis,  
 Caressè coula bërnufia,  
 Ch' a ramassa e cheui 'l mnis;  
 I vedri (i digh pa busia,  
 Bin la cosa com' a sta)  
 A confondve d' cortesia,  
 E stropieve d' onestà.  
 I veui pa gnanca di ch' a sio  
 Tuti quanti così gnoch,  
 Ma cherdi pur tut lo ch' i v' dio,  
 Ch' i m' falisso bin d' poch;  
 L' è un bel seugn se tra cinquanta  
 I na treuve doi o tre  
 Ch' a sio nen d' l' istessa pianta,  
 I giugria finna 'l prè.

### Regole e Costituzioni

lasciate dal Successore di Giacomo Tros.

### CANZONE XXXIII.

Com' Giaco Tros m' ha dame  
 Pr soa cortesia  
 La carica cumpia  
 D' esse so successor;  
 Pr vantageme 'l credit  
 I veui fè tut me debit .